

**O‘ZBEK VA QORAQALPOQ TILI LEKSIK QATLAMIDA
NEOLOGIZMLAR SHAKLLANISHINING O‘ZIGA XOSLIGI**

O‘razboyev Olimjon Rustam o‘g‘li

Berdaq nomidagi Qoraqalpoq davlat universiteti magistranti

Annotatsiya: *O‘zbek va qoraqalpoq tili leksik taraqqiyotining navbatdagi bosqichi so‘nggi o‘n yillikdagi davri bilan bog‘liqdir. Jamiyatimiz har bir sohasida boshlangan tub islohotlar, xalqaro madaniy, iqtisodiy, siyosiy hamda sport sohasidagi aloqalar ma‘lum til o‘zgarishlariga, tilimiz taraqqiyotiga yangi yo‘l ochdi.*

Kalit so‘zlar: *agronimiya, agroiqtisodiyot, agrobiznes, agrosanoat, neologizm, “yangilanish, “o‘zgarish”, “zamonaviylashish”, individual nutq neologizmi, rayon, oblast, otpuska, praktika, ekonomika, gimn.*

Summary: *The next stage of the lexical development of the Uzbek and Karakalpak languages is related to the period of the last decade. Fundamental reforms in every sphere of our society, international cultural, economic, political and sports relations have opened a new way for certain language changes and development of our language.*

Key words: *agronomy, agro-economics, agro-business, agro-industry, neologism, "renewal, "change", "modernization", neologism of individual speech, region, oblast, otpuska, practice, economy, anthem.*

Аннотация: *Следующий этап лексического развития узбекского и каракалпакского языков относится к периоду последнего десятилетия. Фундаментальные реформы во всех сферах нашего общества, международных культурных, экономических, политических и спортивных связей открыли новый путь для определенных языковых изменений и развития нашего языка.*

Ключевые слова: *агрономия, агро-экономика, агро-бизнес, агропромышленность, неологизмы, «обновление», «перемена», «модернизация»,*

неологизмы индивидуальной речи, регион, область, отпуск, практика, экономика, гимн.

Uzoq vaqtlik muloqot natijasida til integratsiyasi sezilarli darajada har ikkala til leksik qatlamiga ham ta'sir qildi. O'zbek tili leksik qatlamiga yangi so'zlar, so'z birikmalari, iboralar, hattoki so'z yasovchi qo'shimchalar ham kirib keldi. Bunday so'zlar, avvalo, mavhum, keyinchalik ularning ko'pchiligi o'z qatlam so'zlari kabi tilimizga moslashib, ajratib bo'lmas holatda o'rinlashdi. Buning sababi sifatida o'zlashma so'zlarning tilda ko'p asrlik nutq jarayoni va til tizimidagi sinonimik, graduonimik, giponimik, bir so'zning faollashuvi ikkinchi so'zni passivlashishi jarayoni kabi munosabatlar hisobiga barqaror o'rnashib qolgan deyish mumkin.

Muhimi shundaki, tilimizning shunday ko'p yillik omuxtalashish jarayonida ham leksik qatlamining katta qismi o'z so'zlarimiz hisobiga saqlab qolgani quvonarli hodisadir. Zeroki, leksikamizdagi o'zlashma so'zlar hisobi hozirgi davr fors tili leksikasiga qiyoslanadigan bo'lsa (ayrim mutaxassislarning ta'kidlashicha, bu til leksik qatlamining 65% ini arabcha so'zlar tashkil etadi) yuqoridagi holat nechog'lik ahamiyatga ega ekanligi va bugungi kunda fors millati uchun til sofliğini saqlash davlat ahamiyatidagi masala sifatida turgani ma'lum bo'ladi.

Bu holat tilda so'z o'zlashishining me'yordan ortiq darajasi bo'lsa, tilimizdagi arab, fors so'zlarining leksik qatlamdagi o'rni, qo'llanishi va miqdori esa so'z o'zlashishining me'yor darajasidagi holatini ko'rsatadi. Aynan shu so'z o'zlashishining me'yordan ortiqlik darajasi til taraqqiyotining salbiy oqibatlarini keltirib chiqarishi mumkin. O'rni kelganda shuni ham aytish lozimki, til omuxtalashishidan chetda qolgan, so'z o'zlashishining me'yordan past darajasida bo'lgan, globallasuv, madaniy, siyosiy, iqtisodiy, sport aloqalaridan uzilgan tilda ham shunday "yakkalanish" holatlar kutilishi mumkin. Hozirgi paytda dunyo tillari orasida o'lik tillar qatoriga o'tib borayotgan bir necha tillar shunday tarixiy jarayonni boshidan kechirmoqda.

Leksikografik sistemadagi yangi neologizmlar ma'lum bir sohadagi tushunchani ifodalab, ular ma'lum bir predmetlar guruhiga, jarayonlarga oid tushunchalardir. Har bir yangi terminologik guruhda umumiy bir unsur bo'ladi. Masalan: *agro* so'zi – agronimiya, agroiqtisodiyot, agrobiznes, agrosanoat kabi o'zlashma neologizmlar uchun asosiy unsur hisoblanadi. Shunday xalqaro terminelemntlar soni hozirda 200dan ortiqligi tilshunoslar tomonidan aniqlangan. XXI asrda jamiyat hayotida boshlangan tarixiy o'zgarishlar tilimizda ham o'z aksini bera boshladi. Bu davr so'zlarning o'zlashish va so'zlarning chiqib ketish jarayonining tezlashgan davri bo'ldi. XX asrda maktablar tashkil etilishi, ommaviy savod chiqarish, gazeta va jurnallarning chop etilishi, maktablarida savod chiqarish kabi omillar asosida bu holat yanada tezlashdi. Bu davrning muhim xususiyati shundaki, tilimizga nafaqat ruscha so'zlar, balki rus tili orqali ko'plab inglizcha, fransuzcha, italyancha va boshqa tillardan so'zlar kirib keldi.

O'zlashma so'zlar datlabki davrda neologizm xarakterida bo'lsa-da, keyinchalik asta-sekin qabul qiluvchi til qonuniyatlariga va tamoyillariga bo'ysunishi, xuddi o'z so'zdek, tushunarli va aniq bo'lishi lozim. Yangi(zamonaviy) so'z aniq, qisqa va tushunarli bo'lishi kerak. Yangi so'zlarning aniqlik tushunchasida uning ma'naviy komponentlarining umumiy ma'nolari tushuniladi. (*barg*), fonetik qayta shakllanishi (*karavot*), grammatik singishi (*bankdan*), so'z yasash tizimida faol ishtirok etishi (*traktorchi*), takror-takror qo'llanishi tufayli uning yot elementigi sezilmay qoladi¹.

O'zbek va qoraqalpoq tili leksik taraqqiyotining navbatdagi bosqichi so'nggi o'n yillikdagi davri bilan bog'liqdir. Jamiyatimiz har bir sohasida boshlangan tub islohotlar, xalqaro madaniy, iqtisodiy, siyosiy hamda sport sohasidagi aloqalar ma'lum til o'zgarishlariga, tilimiz taraqqiyotiga yangi yo'l ochdi. Muhimi shundaki, bu davrga kelib, turli tillarga oid turli soha so'zlari kirib kelishi kuchaydi. Dunyo tillarini o'rganish bilan birga ularning milliy-madaniy

¹ O'zbekiston Milliy Ensiklopediyasi. –T., O'zbekiston milliy ensiklopediyasi. 10-tom. 2002, 498-bet.

an'analari, urf-odatlariga muvofiq tushuncha va so'zlarning o'zlashishi tilimiz lug'at boyligini yanada oshirdi.

Bugun dunyo hamjamiyati barcha jabhada globallashuv jarayonini boshdan kechirmoqda. Aslida globallashuv doimiy jarayon bo'lib, termin sifatida o'zi bilan birga – “yangilanish, “o'zgarish”, “zamonaviylashish” kabi bir qator ma'nolarni ham ergashtirib yuradi. Lingvistik nuqtayi nazardan zamonaviylashish jarayonini o'rganish ham tadqiqotchini keng qamrovda izlanishga undaydi: terminlarni til madaniyatining bir elementi sifatida qarash til egasining tilga munosabatini ham yoritishni talab etadi. Har qanday holatda ham zamonaviylashish jarayoni bor va u lingvistik hosilalarga ega. Tilshunoslikda mazkur hodisa bir necha ko'rinishga ega bo'lib, termin sifatida unga quyidagicha ta'rif berishimiz mumkin:

Til modernizatsiyasi – ma'lum bir tilning boshqa tillar ta'siri bilan zamonaviylashishi;

Leksik modernizatsiyalashish (zamonaviylashish) – ma'lum bir tilga ayni davrda urfda bo'lgan chet tildagi so'zlarning o'zlashishi va o'sha tilda muqobilli yoki muqobilsiz tarzda iste'molda bo'lishidir.

XXI asr jahon hamjamiyati tomonidan ulkan o'zgarishlar, texnik taraqqiyot, axborotlashtirish asri sifatida tarixda qolishi e'tirof etilmoqda. Ayni paytda qisqa muddat davomida yangiliklarning dunyo bo'ylab ommalishishi, jamiyatdagi shunday yangiliklarga bo'lgan ehtiyoj har bir til leksik tarkibining ma'lum bir jihatdan o'zgarishiga olib kelmoqda. Bugungi kun neologizmlarning kirib kelishi, ularni omma tomonidan iste'molda bo'lishi tilimiz lug'atlarida aks etishini kutayotgani yo'q. Zamonaviy texnika sohasidagi xalqaro bog'liqlik va yaqinlik tilimizda ko'plab shunday tushunchalarni o'z so'zlarimiz bilan ifodalashga o'rin qoldirmayapti. Ba'zi bir o'zlashma so'zlarning ma'nolari lug'atlarda ham qayd etilmagan (*Flesh, Koka-kola, Pepsi, Moxito*). Bugungi kunda zamonaviy texnika so'zlari dunyo bo'ylab baynalmilal soha so'zlari darajasiga ko'tarilib bormoqda.

Istiqoldan soʻng oʻzbek va qoraqalpoq tili lugʻat boyligi ham shunday soʻzlar hisobiga kengaydi va taraqqiy etdi. Buning sababi sifatida quyidagilarni koʻrsatish mumkin.

1. Mustaqillikdan soʻng jamiyat hayotida siyosiy, iqtisodiy, maʼnaviy-maʼrifiy va boshqa sohalarda boʻlgan oʻzgarishlar.

2. Jahon miqyosidagi ilf-fan, texnika, axborot-kommunikatsiya va sport taraqqiyoti taʼsiri.

3. Xorijiy tilda muloqot qiluvchi yurtdoshlarimizning yangi (zamonaviy) oʻzlashma soʻz va terminlarni oʻz nutqlarida koʻplab qoʻllashlari.

Oʻzbek tilining izohli lugʻatida oʻzlashma soʻzlarning qaysi tilga tegishli ekani alohida shartli qisqartmalar asosida koʻrsatilar ekan, ularning oʻz tilidagi lugʻaviy maʼnosi va tilimizga oʻzlashganidan keyingi bir maʼnoliligi yoki koʻp maʼnolilik xususiyati alohida koʻrsatib berilgan. Shuni alohida taʼkidlash joizki, oʻzbek tilining izohli lugʻatida oʻzlashma soʻz olib kirgan tillar sifatida 16 ta til soʻzlaridan misollar berilgan. Bular sirasiga *arab, fransuz, fors-tojik, golland, hind, ingliz, ispan, italyan, lotin, moʻgʻul, nemis, polyak, rus, xitoy, yunon, chex* tillari kiritilgan. Biroq adabiyotshunoslik terminlarining ruscha-oʻzbekcha izohli lugʻati² va qisqacha siyosiy lugʻat³ da *portugal* va *skandinavcha* tillardan olingan soʻzlar ham koʻrsatilgan. Bu kabi tillardan olingan soʻzlar maʼlum bir sohaga oid termin ekanligi uchun “Oʻzbek tilining izohli lugʻati”dan oʻrin olmagan boʻlishi mumkin.

Neologizmlarning paydo boʻlish yoʻllari xilma-xil boʻlib, ular tilning mavjud lugʻaviy tarkibi va grammatik qonun-qoidalari asosida yangi soʻz yasash yoʻli, shuningdek, mavjud soʻzning lugʻaviy maʼnolaridan birini yangi maʼnoda qoʻllash yoʻli bilan va boshqa tildan soʻz qabul qilish orqali hosil qilinadi⁴.

Maʼlumki, tilda umumtil neologizmi va individual nutq neologizmi mavjud boʻlib, umumtil neologizmi jamiyat hayotida katta oʻrin egallaydi. Bunday

² Hotamov N. Sarimsoqov B. Adabiyotshunoslik terminlarining ruscha-oʻzbekcha izohli lugʻati. –T. Oʻqituvchi. 1979. 6-bet.

³ Onikov L.A., Shishlin N.V. Qisqacha siyosiy lugʻat. –T. Oʻzbekiston. 1983. 6-bet.

⁴ Oʻzbekiston milliy ensiklopediyasi. –T., Oʻzbekiston milliy ensiklopediyasi. 6-tom. 308-bet.

neologizmlar muallif tomonidan ma'lum bir uslubiy talab asosida yaratiladi. Biroq har qanday yangi neologizmlar, avvalo, individual nutqda paydo bo'ladi. Bunday so'zlar jamiyat a'zolari tomonidan qabul qilinsa, til tizimida shu so'zga ehtiyoj bo'lgan holatdagina o'z vazifasini bajarib, umumtil neologizmi qatoriga o'tishi mumkin. Tilimizda shunday vazifani bajara olmay individual nutq neologizmi sirasiga qolib ketayotgan leksemalar ham talaygina.

Ba'zi manbalarda neologizmlar ma'lum bir guruh va turlarga ajratib o'rganilar ekan, haqiqiy neologizmlarning paydo bo'lishi nomlangan voqelikning yangi nomi bo'lishi lozimligini asos qilib olishadi⁵. Biroq hozirgi paytda til tizimida neologizmlarning paydo bo'lish talabi jamiyat taraqqiyotiga mos ravishda o'zgardi. So'zlarning bir tildan ikkinchi tilga o'tishi ma'lum bir yangi voqea-hodisaning yangi nom sifatida shakllanishiga, til leksik "to'plam"ga o'rnatilishiga sabab bo'lmoqda. Jahon xalqlari orasidagi o'zaro madaniy, siyosiy, iqtisodiy hamkorlik til rivojlanish jarayoniga ham o'zining shunday ta'sirlarini o'tkazib bormoqda.

Mavjud manbalarda neologizmlar o'rganilar ekan, ularda bugungi kun neologizmlari sifatida ma'lum bir so'zlarni alohida ta'kidlab ko'rsatilganini kuzatish qiyin. Shunday neologizmlar qatoriga *kosmos, telivedeniye*⁶; *konfliktsizlik, kosmodrom*⁷; *marketing, qayta qurish, reyting, tender*⁸ kabilar ko'rsatilsa-da, ularni hozirda yangilik bo'yog'ini yo'qotgan, zamonaviy qatlam so'zlari sifatida baholab, hozirgi iste'molda bo'lgan yangi so'zlarga misol bo'lmaydi. Buning sababi shundaki, umumtil neologizmlarining qisqa muddat shu vazifani bajarishi, bu tushunchaning nisbiyligi, shuningdek, ko'pgina so'zlarning yangilik bo'yog'ini jamiyatning barcha soha vakillari birdek qabul qilmasligidadir.

Neologizm tushunchasi va tilimizda paydo bo'layotgan yangi so'zlarni turli soha vakillari va jamiyatning turli qatlam kishilari uchun doimo birdek ahamiyat

⁵ O'zbekiston milliy ensiklopediyasi. –T., O'zbekiston milliy ensiklopediyasi. 6-tom. 309-bet.

⁶ Shoabdurahmonov Sh. va boshqalar. Hozirgi o'zbek adabiy tili. –T., O'qituvchi. 1980. 127-b.

⁷ Tursunov U., Muxtorov J., Rahmatullayev Sh. Hozirgi o'zbek adabiy tili. –T., O'zbekiston. 1992. 156-b.

⁸ O'zbekiston milliy ensiklopediyasi. –T., O'zbekiston milliy ensiklopediyasi. 12 tom. 2000-2006.

kasb etmasligi masalasini turlicha tushunish mumkin. Odatda ziyoli, yangilikka qiziquvchi kishilar va yoshlar atrofidagi o'zgarishlarga nisbatan befarq bo'lishmaydi. Ular jamiyatda bo'layotgan o'zgarishlarni tez anglaydilar. Ba'zi bir tabaqa vakillari borki, ularga ma'lum bir texnologiya va yangilik ko'z o'ngida joriy qilinmagunga qadar bu hodisaga befarq bo'lishi kuzatiladi. Umuman olganda, jamiyat a'zolarining neologizmlarga bo'lgan munosabati ularning ijtimoiy hayotga bo'lgan faol yoki sust yondashishi bilan bog'liqdir. Shunga ko'ra, ayrim o'rinlarda ba'zi bir yangilik bo'yog'iga ega bo'lgan zamonaviy so'zlarning (neologizmlarning) tilda tutgan o'rni haqida keskin xulosa chiqarish to'g'ri bo'lmasligi mumkin.

Bundan 20-30 yil ilgari ham har ikkala tilning boyishida ham ichki manba orqali so'z yasashdan ko'ra o'zlashtirish ustun bo'lib borayotgani kuzatilgan edi⁹. Hozir ham tilimiz taraqqiyotida shunday jarayon davom etmoqda.

Mustaqallikdan so'ng tilimizga yangi so'zlarning kirib kelishi qanchalik tezlashgan bo'lsa, ko'pgina so'zlarning tilimizning leksik qatlamidan chiqib ketishi shunchalik tezlashdi. Shu bilan bir qatorda tilimizga *blog, piar, WiFi, brend, email, virtual, menejer, paynet* kabi neologizmlar ham kirib keldi.

Eskirgan so'zlar sirasidagi *rayon, oblast, otpuska, praktika, ekonomika, gimn*, so'zlari iste'moldan chiqib o'rnini yangi so'zlar yoki ma'nodosh qatoridagi boshqa bir so'z egallagan bo'lsa, *sovxoz, kolxoz* so'zlari tarixiy so'zlar qatoriga o'tdi. Bu kabi sho'rolar boshqaruvi tizimini ifodalovchi eskirgan so'zlar tilimizda talaygina topiladi.

Tilimizda mavjud bo'lgan *vazir, posbon, hokim*, kabi ko'pgina so'zlarning vazifa doirasi va mazmuniy mundarijasi kengaydi¹⁰. Shakllangan bozor iqtisodiyoti sohasidagi yangi tushunchalar, fan va texnika, axborot-kommunikatsiya, sport sohasidagi yangi so'zlar tilimiz boyligini oshirishda muhim omil sifatida qaraladi. Texnika sohasining kompyuter, internet va ular bilan bog'liq bo'lgan ma'lum bir soha so'zlari tilimizda soha (terminologik)

⁹ Tursunov U., Muxtorov J., Rahmatullayev Sh. Hozirgi o'zbek adabiy tili. –T., O'zbekiston. 1992. 175-b

¹⁰ O'zbekiston milliy ensiklopediyasi.–T., O'zbekiston milliy ensiklopediyasi. 12-tom. 2006. 65-bet.

soʻzlari sifatida emas, kengaygan holda umumisteʼmol soʻzlari sifatida ishlatilmoqda.

Foydalanilgan adabiyotlar

1. Qurbonova, M., Abjalova, M., Axmedova, N., Toʻlaboyeva, R. 2021. Oʻzbek tilidagi oʻzlashma soʻzlarning urgʻuli lugʻati, 2 jild. Toshkent.
2. Hamidulla Dadaboyev. 2019. Oʻzbek terminalogiyasi. Toshkent.
3. Antonova O. A. 2005. “Biz qaysi tilda gaplashamiz?”.
4. Oʻzbek tiliga xorijiy tillardan kirib kelganiqtisodiy va biznes sohadagi neologizmlar. Manzura Abjalova Xursandoy Geldiyev
5. Shoabdurahmonov Sh. va boshqalar. Hozirgi oʻzbek adabiy tili. –T., Oʻqituvchi. 1980. 127-b.
6. Tursunov U., Muxtorov J., Rahmatullayev Sh. Hozirgi oʻzbek adabiy tili. – T., Oʻzbekiston. 1992. 156-b.
7. Oʻzbekiston milliy ensiklopediyasi. –T., Oʻzbekiston milliy ensiklopediyasi. 12 tom. 2000-2006.
8. Tursunov U., Muxtorov J., Rahmatullayev Sh. Hozirgi oʻzbek adabiy tili. – T., Oʻzbekiston. 1992. 175-b